

Segun diferente opinion:

Pueblo di Aruba no ta acepta chantahe di e famia di Natalee!

ORANJESTAD (AAN) — Comunidad di Aruba ta sumamente desapunta cu e situacion reinante encuanto e desaparicion di e estudiante Mericano, y e pregunta cu ta bin for di opinion publico ta, si direpente e mayornan di e mucha muher Holloway a bira pover, y si direpente nan no ta influyente mas. Sin kita afo e sentimento di

compasion cerca nos pueblo pa cu e mayornan di e hoben, dunando nan e beneficio di duda pasobra un otro pregunta cu a surgi e dianan aki ta si enberdad nan ta sincero y si e asunto aki no ta di un otro dimension manera hopi di nos hendenan a cuminza sospecha, e hecho cu e famia di Natalee ta pretende cu gobiernu di

Aruba tin cu paga e grupo di rescate cu nan mes a trece Aruba, ta algo cu nos comunidad ta nenga di acepta pasobra e ta sona "chantahe!" Ciertu declaracionnan cu e mama di e mucha muher a duna a pone diferente hende na Aruba hasta hari, manera e dia cu e señora a bisa cu su yiu mester, alomenos, a worde viola pasobra e tabata

birgen.

Personanan di Aruba cu a biba na Merca a conta nos cu masha dificil ta pa kere cu un mucha muher Mericano di 18 aña por ta birgen ainda. Pa nan libertinahe ta algo cultural, pues nada nobo.

Na Aruba ainda nos ta spanta ora nos ta tende cu muchanan di 13-14 aña tin relacion sexual caba. Pero na Merca esaki ta nada di otro mundo y nos comunidad no ta guli e pildora ey cu e mama di e mucha muher Mericano kier obliga nos pueblo pa guli.

Ta imposible na prome lugar cu un mucha muher berdaderamente decente subi un auto bao influencia di alcohol caba, cu tres guy cu el a caba di conoce apenas un par di dia prome cu el a sparce.

Nos no por confirma ken ta ken enberdad via telefon, pero DIARIO a ricibi yamada di hende cu ta bisa cu ta trahana e hotel unda e grupo di studiantenan a hospeda, y cu locual nan a wak no tabata mucho bunita pa e mucha aki, y sigur leu for di e imagen cu e tanta y e mama di dje kier perfila awor.

Pero nos redaccion no por ripiti loke nos a tende pasobra nos no tin prueba. Pero si ta asina manera nos a scucha, kieren anto cu e tanta y e mama no tabata conoce bon nan sobrina y yiu.

Y no ta intencion di ningun hende pa huzga y punta dede, pasobra awendia e hubentud a cambia nan balornan na henter mundo; no obstante ta dificil pa den nos cultura nos muchanan muher den nan sano huicio, incluso esnan di cabes un tiki loco, por subi un auto cu tres guy desconoci.

Cu poco excepcion nos por bisa cu casi na termino general, nos mayornan na Aruba ta keda preocupa ora nos yiunan ta sali bay un discoteca y nos ta keda yama nan na telefon, wak unda nan ta, con nan stem ta sona, y prome cu nan sali nos ta bin cu e "letania" di semper pa nan cuida nan curpa bon, y esaki ta haci un diferencia ainda, entre nos hobennan y esnan di Merca of Europa.

En todo caso, ta asina tambe cu hopi di nos hendenan cu na dado momento a pensa cu e mucha muher no ta na bida

mas, awor a cambia nan pensamento y nan ta kere cu el a huy di su mama y su padraastro y cu e por ta den cualkier otro ciudad di Merca, kizas cu otro nomber pasobra Mericanonan ta parce otro asina hopi cu e bon por a planea tur cos di anticipa, anto sali for di nos pais cu cedula di un amiga, cu e por a sali Aruba subi avion, sin ser nota pa autoridadnan di inmigracion Mericano.

Diferente di e personanan cu a yama nos redaccion ta convenci cu un mentira no ta keda oculto pa hopi tempo, y cu e berdad lo sali afo mas laat of mas tempran, y si tin culpabilidad cerca e tres muchanan local esaki lo worde proba, y si no ta asina tambe lo worde proba y den e caso aki ohala Aruba lo por cobra daño y perjuicio contra e famia Holloway y contra esnan concerni di prensa Mericano cu a duna Aruba asina un mal nomber dilanti henter mundo.

Pasobra si tin un otro desaroyo tras di henter e situacion aki, e lo ta algo imperdonable!

Ya caba e Mericanonan aki a mustra di ta masha mal gradici pasobra Gobierno, pueblo y Sector Privado a haci hopi esfuerzo pa haya Natalee y si e no ta aparece, si el a "perde" na un forma asina straño y misterioso a bira ora pa cuminza busca na Alabama tambe, pa interroga su "boy friend", su amiganan, e chaperonnan y puntra nan pakico nan si a subi avion bay, lagando Aruba su so cu henter e problema aki. Kico nan tin di sconde?

Aruba a habri porta y espacio aereo pa hendenan di Merca tanto autoridadnan policial como prensa haci nan trabao, y hasta nan a abusa di nos confianza cuestionando nos sistema hudicial y nos autoridadnan. Algo cu no mester a sosode. Anto, kico mas nan kier?

Esaki ta parti di e reaccionnan cu nos comunidad ta treciendo dilanti na e momentonan aki, unda bon por bisa cu e cansancio y frustracion ta grandi riba e caso aki, cu enberdad nos tur ta desea pa yega su capitulo final.